

佛說彌勒下生經

姚秦三藏法師鳩摩羅什譯



南無本師釋迦牟尼佛

說明

本繁體校正版《佛說彌勒下生經》電子書，根據《乾隆大藏經》大乘五大部外重譯經，第 0201 部，姚秦三藏法師鳩摩羅什譯《佛說彌勒下生經》原藏影印本校正。句讀僅作參考。

本電子書是免費結緣品，特此說明。

仁慧草堂

二〇一八年十二月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誡誡曩. 三婆嚩. 禡日囉斛

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇

我今見聞得受持 願解如來真實義

佛說彌勒下生經

一名彌勒
當來成佛

姚秦三藏法師鳩摩羅什譯

大智舍利弗，能隨佛轉法輪，佛法之大將，憐愍衆生故，白佛言：“世尊！如前後經中說，彌勒當下作佛，願欲廣聞彌勒功德、神力、國土莊嚴之事，衆生以何施、何戒、何慧得見彌勒？”

爾時，佛告舍利弗：“我今廣爲汝說，當一心聽。舍利弗，四大海水以漸減少三千由旬，是時，閻浮提地長十千由旬，廣八千由旬，平坦如鏡，名華輦草遍覆其地，種種樹木、華果茂盛，其樹悉皆高三十里。城邑次比雞飛相及，人壽八萬四千歲，智慧威德色力具足，安隱快樂，唯有三病：一者，便利；二者，飲食；三者，衰老。女人年五百歲爾乃行嫁。是時，有一大城名翅頭末，長十二由旬，廣七由旬，端嚴殊妙，莊飾清淨，福德之人充滿其中，以福德人故，豐樂安隱。其城七寶，上有樓閣。戶牖軒窗，皆是衆寶，眞珠羅網彌覆其上。街巷道陌廣十二里，掃灑清淨，有大力龍王，名曰多羅尸棄，其池近城。龍王宮殿在此池中，常

於夜半降微細雨，用淹塵土。其地潤澤，譬如油塗，行人往來，無有坌塵。時世人民，福德所致，巷陌處處有明珠柱，皆高十里，其光照曜，晝夜無異，燈燭之明不復爲用。城邑舍宅及諸里巷，乃至無有細微土塊，純以金沙覆地，處處皆有金銀之聚。有大夜叉神，名跋陀波羅賒塞迦，常護此城，掃除清淨。若有便利不淨，地裂受之，受已還合。人命將終，自然行詣冢間而死。時世安樂，無有怨賊劫竊之患，城邑聚落無閉門者，亦無衰惱、水火、刀兵，及諸饑饉、毒害之難。人常慈心、恭敬、和順，調伏諸根，言語謙遜。舍利弗，我今爲汝粗略說彼國界城邑富樂之事。其諸園林池泉之中，自然而有八功德水，青紅赤白雜色蓮華，遍覆其上。其池四邊四寶階道，衆鳥和集，鳧、鴈、鴛鴦、孔雀、翡翠鸚鵡、舍利、鳩那羅、耆婆耆婆等諸妙音鳥，常在其中；復有異類妙音之鳥，不可稱數，果樹香樹充滿國內。

“爾時，閻浮提中，常有好香，譬如香山。流水美好，味甘除患。雨澤隨時，穀稼滋茂，不生草穢，一種七穫，用功甚少，所收甚多，食之香美，氣力充實其國。

“爾時，有轉輪王名曰儂佉，有四種兵，不以威武治四天下。其王千子，勇健多力，能破怨敵。王有七寶：金輪寶、象寶、馬寶、珠寶、女寶、主藏寶、主兵寶。又其國土有七寶臺，舉高千丈，千頭千輪廣六十丈。又有四大藏，一一大藏各有四億小藏圍繞。伊勒鉢大藏在乾陀羅國，般軸迦大藏在彌提羅國，賓伽羅大藏在須羅吒國，儂佉大藏在波羅奈國。此四大藏縱廣千由旬，滿中珍寶，各有四億小藏附之。有四大龍，各自守護。此四大藏及諸小藏自然湧出，形如蓮華，無央數人皆共往觀。是時，衆寶無守護者，衆人見之，心不貪著，棄之於地，猶如瓦石草木土塊。時人見者，皆生厭心，而作是念：‘往昔衆生爲此寶故，共相殘害，更相偷劫、欺誑、妄語，令生死罪緣展轉增長。

“翅頭末城衆寶羅網，彌覆其上，寶鈴莊嚴，微風吹動，其聲和雅，如扣鍾磬。其城中有大婆羅門主名曰妙梵，婆羅門女名曰梵摩波提，彌勒託生以爲父母，身紫金色三十二相，衆生視之無有厭足；身力無量不可思議，光明照曜無所障閔，日月火珠都不復現；身長千尺，

宵廣三十丈，面長十二丈四尺。身體具足端正無比，成就相好如鑄金像。肉眼清淨見十由旬，常光四照面百由旬，日月火珠光不復現，但有佛光殊妙第一。

“彌勒菩薩觀世五欲致患甚多，衆生沉沒在大生死甚可憐愍。自以如是正念觀故，不樂在家。時，僊佉王共諸大臣，持此寶臺，奉上彌勒。彌勒受已，施諸婆羅門。婆羅門受已，即便毀壞，各共分之。彌勒菩薩見此妙臺須臾無常，知一切法皆亦磨滅，修無常想出家學道，坐於龍華菩提樹下，樹莖枝葉高五十里，即以出家日得阿耨多羅三藐三菩提。爾時，諸天龍神王不現其身而雨華香，供養於佛，三千大千世界皆大震動，佛身光明照無量國，應可度者皆得見佛。

“爾時，人民各作是念：‘雖復千萬億歲受五欲樂，不能得免三惡道苦。妻子財產所不能救，世間無常，命難久保。我等今者宜於佛法修行梵行。’作是念已，出家學道。時，僊佉王亦共八萬四千大臣恭敬圍繞，出家學道。復有八萬四千諸婆羅門聰明大智，於佛法中亦共出家。復有長者名須達那，今須達長者是，

是人亦與八萬四千人俱共出家。復有梨師達多富蘭那兄弟，亦與八萬四千人出家。復有二大臣，一名梅檀，二名須曼，王所愛重，亦與八萬四千人俱，於佛法中出家。僂佉王寶女名舍彌婆帝，今之毗舍佉是也，亦與八萬四千嫫女俱共出家。僂佉王太子名曰天色，今提婆那是，亦與八萬四千人俱共出家。彌勒佛親族婆羅門子，名須摩提，利根智慧，今鬱多羅是，亦與八萬四千人俱於佛法中出家。如是等無量千萬億衆，見世苦惱，皆於彌勒佛法中出家。

“爾時，彌勒佛見諸大衆作是念言：‘今諸人等，不以生天樂故，亦復不爲今世樂故，來至我所，但爲涅槃常樂因緣。是諸人等，皆於佛法中種諸善根，釋迦牟尼佛遣來付我。是故今者皆至我所，我今受之。是諸人等或以讀誦分別決定修妬路、毗尼、阿毗曇藏，修諸功德來至我所；或以衣食施人持戒智慧，修此功德來至我所；或以旛蓋華香供養於佛，修此功德來至我所；或以布施、持齋、修習慈心，行此功德來至我所；或爲苦惱衆生，令其得樂，修此功德來至我所；或以持戒、忍辱、修清淨慈，以此功德來至我所；或以施僧常食、齋講

設會供養飯食，修此功德來至我所；或以持戒多聞，修行禪定無漏智慧，以此功德來至我所；或有起塔供養舍利，以此功德來至我所。善哉！釋迦牟尼佛能善教化如是等百千萬億衆生，令至我所。

“彌勒佛如是三稱讚釋迦牟尼佛，然後說法而作是言：‘汝等衆生，能爲難事，於彼惡世貪欲、瞋恚、愚癡、迷惑、短命人中，能修持戒，作諸功德，甚爲希有！爾時，衆生不識父母，沙門、婆羅門不知道法，互相惱害，近刀兵劫，深著五欲，嫉妬諂曲，佞濁邪僞，無憐愍心，更相殺害，食肉飲血。汝等而能於中修行善事，是爲希有！善哉！釋迦牟尼佛以大悲心，能於苦惱衆生之中說誠實語，示我當來度脫汝等。如是之師甚爲難遇，深心憐愍惡世衆生，救拔苦惱令得安隱。釋迦牟尼佛爲汝等故，以頭布施，割截耳、鼻、手、足、支體，受諸苦惱，以利汝等。彌勒佛如是開導安慰無量衆生，令其歡喜，然後說法。福德之人充滿其中，恭敬信受渴仰大師，各欲聞法皆作是念：‘五欲不淨，衆苦之本。’又能除捨憂感愁惱，知苦樂法皆是無常。彌勒佛觀察時會大衆，心

淨調柔，爲說四諦，聞者同時得涅槃道。

“爾時，彌勒佛於華林園，其園縱廣一百由旬，大衆滿中。初會說法，九十六億人得阿羅漢；第二大會說法，九十四億人得阿羅漢；第三大會說法，九十二億人得阿羅漢。彌勒佛既轉法輪度天人已，將諸弟子入城乞食。無量淨居天衆恭敬從佛，入翅頭末城。當入城時，現種種神力無量變現。釋提桓因與欲界諸天，梵天王與色界諸天，作百千妓樂，歌詠佛德，雨諸天華、栴檀末香，供養於佛。街巷道陌豎諸旛蓋，燒衆名香，其烟若雲。世尊入城時，大梵天王、釋提桓因合掌恭敬，以偈讚曰：

正遍知者兩足尊 天人世間無與等
十力世尊甚希有 無上最勝良福田
其供養者生天上 稽首無比大精進

“爾時，天人羅刹等見大力魔，佛降伏之，千萬億無量衆生皆大歡喜，合掌唱言：‘甚爲希有！甚爲希有！如來神力功德具足，不可思議！’是時，天人以種種雜色蓮華及曼陀羅華，散佛前地，積至于膝。諸天空中，作百千妓樂，歌歎佛德。爾時，魔王於初夜後夜覺諸人民，作如是言：‘汝等既得人身，值遇好時，不應

竟夜睡眠覆心。汝等若立若坐，當勤精進，正念諦觀五陰無常、苦、空、無我。汝等勿爲放逸不行佛教，若起惡業，後必致悔。’時，街巷男女皆勸此語言：‘汝等勿爲放逸不行佛教，若起惡業，後必有悔。當勤方便，精進求道，莫失法利，而徒生徒死也。’如是大師拔苦惱者甚爲難遇，堅固精進，當得常樂涅槃。

“爾時，彌勒佛諸弟子普皆端正威儀具足，厭生老病死，多聞廣學，守護法藏，行於禪定，得離諸欲，如鳥出殼。爾時，彌勒佛欲往長老迦葉所，即與四衆俱，就耆闍崛山，於山頂上見大迦葉。時，男女大衆心皆驚怪。彌勒佛讚言：‘大迦葉比丘是釋迦牟尼佛大弟子，釋迦牟尼佛於大衆中常所讚歎：頭陀第一，通達禪定解脫三昧。是人雖有神力，而無高心，能令衆生得大歡喜，常愍下賤貧惱衆生，救拔苦惱令得安隱。’彌勒佛讚大迦葉骨身言：‘善哉！大神德釋師子大弟子大迦葉，於彼惡世能修其心。’爾時，人衆見大迦葉爲彌勒佛所讚，百千億人因是事已厭世得道，是諸人等念釋迦牟尼佛於惡世中教化無量衆生，令得具六神通，成阿羅漢。爾時，說法之處，廣八十由旬，長

百由旬。其中人衆，若坐若立，若近若遠，各各自見佛在其前獨爲說法。彌勒佛住世六萬歲，憐愍衆生令得法眼，滅度之後，法住於世亦六萬歲。汝等宜應精進發清淨心，起諸善業，得見世間燈明彌勒佛身必無疑也！”

佛說是經已，舍利弗等歡喜受持，作禮而去。

佛說彌勒下生經

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無當來下生彌勒佛 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法

三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德 普及於一切
我等與眾生 皆共成佛道

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；
自皈依僧，當願眾生，統理大眾，一切無礙。和南聖眾。

南无护法韦驮尊天菩萨



此咒置經書中可滅誤跨之罪